

TEKS KHUTBAH GERHANA

الْحَمْدُ لِلَّهِ وَسَلَامٌ عَلَىٰ عِبَادِهِ الَّذِينَ اصْطَفَىٰ، أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ، اللَّهُمَّ صَلِّ وَسَلِّمْ عَلَىٰ سَيِّدِنَا مُحَمَّدٍ وَعَلَىٰ آلِهِ وَأَصْحَابِهِ أَجْمَعِينَ. أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تُقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ.
قَالَ تَعَالَىٰ فِي كِتَابِهِ الْعَزِيزِ:

وَمِنْ آيَاتِهِ اللَّيْلُ وَالنَّهَارُ وَالشَّمْسُ وَالْقَمَرُ لَا تَسْجُدُوا لِلشَّمْسِ وَلَا لِلْقَمَرِ
وَأَسْجُدُوا لِلَّهِ الَّذِي خَلَقَهُنَّ إِن كُنْتُمْ إِيَّاهُ تَعْبُدُونَ

Sidang jemaah yang dirahmati Allah sekalian,

Di dalam ayat yang dibacakan sebentar ta, jelas kepada kita bahawa malam dan siang itu adalah tanda atau bukti kekuasaan Allah yang tidak dapat ditandingi. Ia menjadi kemudahan bagi manusia untuk menyusun dan mengatur kehidupan mereka di muka bumi Allah ini. Demikian juga dengan kejadian alam semesta dengan pelbagai fenomena yang berlaku di dalamnya adalah lambang kewujudan dan kekuasaan Allah Ta'ala ke atas makhluknya. Ayat ini juga menuntut agar kita patuh dan tunduk hanya kepada Allah Taala, bukan kepada makhluk ciptaanNya.

Sidang hadirin yang dirahmati Allah sekalian,

Seringkali kita sebagai hamba Allah lupa akan kewajipan kita sbagai khalifah di muka bumi ini lantas membuat kesilapan dan kesalahan yang mengundang kemurkaan Allah Ta'ala. Kita lalai melaksanakan suruhan dan perintah-perintahNya sehingga ada di antara kita yang leka dengan kemaksiatan dan kemungkaran dalam kehidupan sehari-hari. Tanpa kita sedar dosa dan kesalahan kita hari demi hari semakin bertambah dan bintik-bintik hitam semakin menghilangkan cahaya keimanan di hati kita ini. Usia kita semakin hampir menemui ajalnya, sedang kita belum lagi membuat periapan dan persediaan yang sewajarnya dalam menghadapi hari tersebut.

Perkara-perkara itu perlulah menjadi tanda tanya kepada diri kita sekalian. Sejauh manakah periapan dan bekalan yang telah kita siapkan dalam mengharungi perjalanan ke akhirat nanti ? sebanyak manakah ibadat yang telah kita laksanakan bagi menyucikan diri dan sanubari kita? Dan apakah usaha kita bagi memastikan keluarga dan masyarakat Islam sentiasa tunduk dan patuh kepada hukum-hukum Allah Ta'ala.

Sidang hadirin sekalian,

Ummul mukminin Saidatina Aishah R.HA berkata Riwayat al-Nasai:

قَدْ جُلِّيَ عَنِ الشَّمْسِ فَخَطَبَ النَّاسَ فَحَمِدَ اللَّهَ وَأَثْنَى عَلَيْهِ ثُمَّ قَالَ إِنَّ الشَّمْسَ
وَالْقَمَرَ لَا يَنْكَسِفَانِ لِمَوْتِ أَحَدٍ وَلَا لِحَيَاتِهِ فَإِذَا رَأَيْتُمْ ذَلِكَ فَصَلُّوا وَتَصَدَّقُوا
وَاذْكُرُوا اللَّهَ عَزَّ وَجَلَّ وَقَالَ يَا أُمَّةَ مُحَمَّدٍ لَوْ تَعْلَمُونَ مَا أَعْلَمَ لَضَحِكْتُمْ قَلِيلًا
وَلَبَكَيْتُمْ كَثِيرًا

Mafhumnya: *"Dan sesungguhnya telah jelas cahaya matahari, maka Rasulullah SAW berkhotbah dihadapan orang ramai sambil memuji Allah SWT dan sesungguhnya matahari dan bulan adalah dua daripada keagungan Allah. Gerhana kedua-duanya berlaku bukan disebabkan mati atau hidup seseorang. Apabila kamu melihat terjadi gerhana matahari atau bulan, maka hendaklah kamu mendirikan solat sunat gerhana dan bersedekah serta memperbanyak mengingati Allah. Sabda Nabi SAW: "Wahai umat Muhammad, jikalau kamu tahu apa yang aku tahu, nescaya kamu sedikit ketawa dan banyak menangis".*

Gerhana bulan adalah satu daripada kejadian alam yang memperlihatkan kebijaksanaan Penciptanya dan menjadi iktibar kepada sekalian manusia. Gerhana itu ialah suatu perubahan, suatu kejadian, suatu keagungan dan kebesaran Tuhan yang berlaku pada matahari dan bulan, di mana kejadian ini adalah suatu perkara yang amat mudah bagi Allah Ta'ala melakukannya.

Gerhana bulan adalah suatu peristiwa yang menakjubkan kepada seluruh umat manusia kerana secara tiba-tiba bulan kehilangan cahayanya. Sesungguhnya gerhana bulan yang berlaku tahun demi tahun merupakan peringatan Allah SWT tentang hari Kiamat dan fenomena ini juga menunjukkan kekuasaan Allah Taala ke atas alam ini. Firman Allah dalam surah al-Qiyamah ayat 7-9:

فَإِذَا بَرِقَ الْبَصَرُ ﴿٧﴾ وَخَسَفَ الْقَمَرُ ﴿٨﴾ وَجُمِعَ الشَّمْسُ وَالْقَمَرُ ﴿٩﴾

Maksud: “ Maka apabila mata terbelalak(ketakutan), dan apabila bulan telah hilang cahayanya dan matahari dan bulan dikumpulkan”.

Sidang hadirin yang dimuliakan,

Pada malam yang indah ini, marilah kita menginsafi diri kita dan mereka yang berada di bawah tanggungjawab kita, agar bertaubat kepada Allah Ta’ala dari segala kesalahan dan kesilapan serta menyesali segala kemungkarannya dan kemaksiatan yang telah kita lakukan. Kita bertaubat kepada Allah Ta’ala dengan taubat nasuha. Marilah kita bedoa kepada Allah agar kita semua, sama ada pemimpin mahupun yang dipimpin melaksanakan amanah dan tanggungjawab mereka, sekiranya ada yang lalai dan tersesat agar kembali ke pangkal jalan dan bertaubat kepada Allah. Ini sebagaimana yang diperintahkan Allah dalam firmanNya dalam Surah Ali Imran ayat 133 yang berbunyi :

Maksudnya : “Dan bersegeralah kamu kepada kampungmu dari Tuhanmu dan syurga yang luasnya seluas langit dan bumi yang disediakan untuk orang-orang yang bertaqwa...”

Kaum muslimin yang berbahagia,

Dalam usaha untuk memperbanyakkan amal kebajikan, supaya kehidupan kita tidak sia-sia, Allah Ta’ala telah memberikan galakan dan perangsang supaya umat manusia membuat kebaikan dengan firmanNya di dalam Surah al-Baqarah ayat 261 yang bermaksud :

“Bandingan (derma) orang-orang yang membelanjakan hartanya pada jalan Allah, ialah sama seperti sebiji benih yang tumbuh menerbitkan tujuh tangkai; tiap-tiap tangkai itu pula mengandungi seratus biji dan (ingatlah), Allah akan melipatgandakan pahala bagi sesiapa yang dikehendakiNya dan Allah Maha Luas (rahmat) kurniaNya, lagi Meliputi ilmu pengetahuanNya.”

Ayat ini memberi fahaman kepada kita betapa banyaknya pahala yang diberikan kepada orang-orang yang gemar mendermakan hartanya ke jalan Allah, iaitu sehingga tujuh ratus kali ganda banyaknya. Ini menunjukkan berlipat gandanya pahala dari Allah bagi orang-orang yang bersifat dermawan dan pemurah dan dengan ayat ini juga mudah-mudahan terbukalah kesempatan yang baik bagi orang-orang yang hendak berbuat baik. Dalam kesempatan untuk beribadat kepada Allah demi menjamin keutuhan iman dan kekayaan

jiwa, Rasulullah s.a.w. pernah bersabda dalam sebuah hadits Qudsi yang diriwayatkan oleh Imam at-Tirmidzi dan Ibnu Majah yang bermaksud :

“Wahai anak Adam, sediakanlah kelapangan buat beribadat kepada Allah, nescaya Aku penuhi dadamu dengan kekayaan jiwa, dan aku tutupi apa-apa jua kekuranganmu, tetapi jika engkau tidak kerjakan sesuatu kebaikan di waktu yang terluang itu, nescaya Aku penuhi di waktu-waktumu itu dengan kesibukan yang berbagai, dan Aku tidak menutupi apa-apa jua kekuranganmu”.

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ
الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ، أَقُولُ قَوْلِي هَذَا وَأَسْتَغْفِرُ
اللَّهَ الْعَظِيمَ لِي وَلَكُمْ، وَلِسَائِرِ الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ،
فَاسْتَغْفِرُوهُ يَا فَوْزَ الْمُسْتَغْفِرِينَ وَيَا نَجَاةَ التَّائِبِينَ.